

Kyā Tū Mujhe Pyār

Kartā Hai?

Barkat Pāne kā Rāz



kyā tū mujhe pyār kartā hai? barkat pāne kā rāz

Do You Love Me? Receiving In Full Measure

by Bakhtullah

[*Ao, Khud Dekh Lo 36*]

(Urdu—Roman script)

© 2024 www.chashmamedia.org

published and printed by

Good Word, New Delhi

The title cover is derived from R. Gunther <https://www.freebibleimages.org/illustrations/rg-resurrection-galilee/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Achchhe Charwāhe kī Pukār Suno	2
Achchhe Charwāhe kī Barkat Pāo	3
Achchhe Charwāhe kī Taqwiyyat Pāo	5
Achchhe Charwāhe kā Pyār Qabūl Karo	9
Achchhe Charwāhe kī Fitrat Apnāo	11
Āpasī Jalan Chhoṛ Do	15
Achchhe Charwāhe kī Sachchāī Apnāo	17
Injīl, Yūhannā 21	18

Jume ke din Īsā Masīh ko sazā-e-maut dī gai. Shāgird ḍar ke māre chhup gae. Un ke ḵhāb dhūl meñ milāe gae the. Wuh sann rah gae. Āge koī rāstā nahīn dikh rahā thā.

Haftē kā din guzar gayā. Phir itwār kā din shurū huā. Us din kuchh logoñ ne achānak Īsā Masīh ko dekhā. Aur wuh bhūt nahīn thā. Uskā pakkā jism thā. Be-shak wuh jagah aur waqt kā pāband nahīn thā, lekin wuh khānā khā saktā thā. Uskī āwāz aur andāz—sab kuchh waisā hī thā. Shāgird use chhū sakte the, bilkul ām ādmī kī tarah. Tab us ne shāgirdoñ ko farmāyā ki Galīl jākar mujh se milo. Ab Yūhannā hameñ Galīl kā ek wāqiyā sunātā hai. Is se ham kāī sabaq sīkhte haiñ. Pahlā sabaq,

Achchhe Charwāhe kī Pukār Suno

Chhīh shāgird Patras ke sāth jamā the. Tab Patras ne kahā, “Maiñ machhlī pakarṇe jā rahā hūñ.” Machhlī pakarṇā to uskā peshā hī thā. Yih kām karte hue wuh parwān chaṛhā thā.

Dūsroñ ne kahā, “Ham bhī sāth jāenge.” Wuh nikalkar kashtī par sawār hue. Lekin us pūrī rāt ek bhī machhlī hāth na āī. Subh-sawere Īsā Masīh jhīl ke kināre par ā khaṛā huā. Lekin dhundhlepan meñ shāgirdoñ ne use na pahchānā. Us ne un se pūchhā, “Bachcho, kyā tumheñ khāne ke lie kuchh mil gayā?”

Āj Īsā Masīh kināre par khaṛe hameñ bhī pukār rahā hai. Shāyad ham use ab tak dhundhlepan meñ sāf pahchān nahīn sakte. Ham apne māmūl ke kām meñ juṭe haiñ magar ḳhās barkat hāsil nahīn ho rahī. Tab achchhā hai ki ham achchhe charwāhe kī āwāz sun leñ. Wuh to apnī bheṛoñ kī fikr kartā hai.

► *Kyā ham uskī āwāz sunte haiñ?*

Īsā Masīh ke sawāl par shāgirdoñ ne jawāb diyā ki ab tak kuchh nahīn milā.

► *Kyā shāgirdoñ ko Īsā Masīh ke binā machhliyān mil gāi thīn?*

Ek bhī nahīn. Kitnī bār ham baṛī mehnat-mashaqqat karte haiñ aur koī phal, koī achchhā natijā nazar nahīn ātā. Aise mauḡoñ par insān sochtā hai ki kyā Ḳhudā mujhe sazā de rahā hai? Mere dost, pahle achchhe charwāhe kī pukār suno. Dūsra sabaq,

Achchhe Charwāhe kī Barkat Pāo

Īsā Masīh ne kahā, “Apnā jāl kashtī ke dāeñ hāth ḡālo, phir tum ko kuchh milegā.” Unhoñ ne aisā kiyā to machhliyoñ kī itnī baṛī tādād thī ki wuh jāl kashtī tak na lā sake.

► *Jab Īsā Masīh ne sāth diyā, to kyā un ko machhli mil gāi?*

Hāñ, itnī machhliyān ki jāl phaṭne kā ḡhatrā thā.

Tab Yūhannā ne Patras se kahā, “Yih to Ḳhudāwand hai.” Yūhannā, Īsā Masīh ke bahut qarīb rahā thā islie use jald hī patā chal gayā ki yih kaun hai.

Uskī bāt sunte hī Patras apnī chādar oṛhkar pānī meñ kūd paṛā (Us ne chādar ko kām karne ke lie utār liyā thā.) Yūhannā samajhne meñ tez thā jabki Patras qadam uṭhāne meñ tez thā.

Dūsre shāgird kashtī par sawār us ke pīchhe āe. Wuh kināre se zyādā dūr nahīn the, taqrīban sau meter ke fāsle par. Islie wuh machhliyon se bhare jāl ko pānī meñ khīnch khīnchkar ḳhushkī tak lāe. Wuh kashtī se utre to dekhā ki lakaṛī ke koyloñ kī āg par machhliyāñ bhunī jā rahī haiñ aur sāth roṭī bhī hai. Īsā ne un se kahā, “Un machhliyon meñ se kuchh le āo jo tum ne abhī pakṛī haiñ.”

Patras kashtī par gayā aur jāl ko ḳhushkī par ghasīṭ lāyā. Yih jāl 153 baṛī machhliyon se bharā huā thā, to bhī wuh na phaṭā.

► *Yūhannā hamen̄ yih sārā mājrā itnī tafsīl se kyon̄ batātā hai?*

Īsā Masīh unheñ ek ahm sabaq sikhānā chāhtā thā. Yih ki mere binā tumhārā kām phaldār nahīn ho saktā chāhe tum kitnī mehnat-mashaqqat kyon̄ na karo. Maiñ hī abadī zindagī kā chashmā hūñ. Pal dar pal merī āwāz suno. Tab hī barkat kī bārish tum par barsegī. Tab hī barkat kā jāl phaṭegā nahīn. Tīsrā sabaq,

Achche Charwāhe kī Taqwiyaṭ Pāo

Īsā Masīh ne un se kahā, “Āo, nāshtā kar lo.” Kisī bhī shāgird ne sawāl karne kī jurrat na kī ki “Āp kaun haiñ?” Kyon̄ki wuh to jānte the ki yih Ḳhudāwand hī hai. Phir Īsā Masīh ne roṭī aur machhlī khilāi.

Yih kitnī anokhī ziyāfat thī! Unhoñ ne kitnī bār apne āqā ke sāth khānā khāyā thā. Be-shak unheñ wuh khānā bhī yād ā rahā thā jab Īsā Masīh ne pāñch roṭiyon̄ aur do machhliyon̄ se pāñch hazār logoñ ko khānā khilāyā thā. Us waqt log josh meñ

ākar use duniyā kā bādshāh banānā chāhte the lekin wuh chupke se wahān se khisak gayā thā. Ab bāt bilkul farq thī. Ab shāgirdoñ ke sāmne āsmān kā bādshāh khule taur se khaṛā thā—wuh jis ne farmāyā thā,

Maiñ hī zindagī kī wuh roṭī hūñ jo āsmān se utar āī hai. Jo is roṭī se khāe wuh abad tak zindā rahegā.

(Yūhannā 6:51)

Apnī qurbānī se us ne insān ko yih zindagī baḡhsh dī thī—wuh abadī zindagī jo imāndār ke dil meñ hotī hai aur jo use Dariyā-e-maut ke pār achchhe charwāhe kī god meñ le jātī hai. Lekin Īsā Masīh ek aur bāt bhī dikhānā chāhtā thā. Yih samajhne ke lie āo, ham ek sawāl pūchheñ:

► *Kyā shāgirdoñ ke nāshte ke lie un kī machhliyan zarūrī thīñ?*

Bilkul nahīñ. Jab shāgird jhīl ke kināre par pahuñche to koyloñ par machhli bhunī jā rahī thī aur sāth roṭī thī. Phir bhī us ne farmāyā ki

pakṛī machhliyon meñ se kuchh khāne ke lie lāo. Wuh is se ek bāt dikhānā chāhtā thā.

► *Kyā bāt dikhānā chāhtā thā?*

Yih ki mujhe tumhārī k̄hidmat pasand hai. Maiñ chāhtā hūñ ki tum milkar merī k̄hātir mehnat-mashaqqat karo. Be-shak ab se tum machhlī nahīñ pakṛoge. Ab se tum mähīgīr ke bajāe ādamgīr yāñī logon ko pakṛne wāle hoge. Kis tarah? Unheñ mere ghar wāle banane kī dāwat dene se. Ek aur sawāl ubhar ātā hai:

► *Īsā Masīh shāgirdon ke sāth khāne kī rifāqat kyon rakhnā chāhtā thā?*

Wuh chāhtā thā ki shāgird us ke huzūr milkar khānā khāne kī ahmiyat samjheñ.

► *Milkar us ke huzūr khānā khāne kī kyā ahmiyat hai?*

Us ke huzūr khānā khānā rifāqat kā sab se gahrā nishān hai.

► *Yih kyon sab se gahrā nishān hai?*

Islie ki yih us āḵhirī khāne kī taraf ishārā hai jo Īsā Masīh ne shāgirdoñ ke sāth khāyā. Us ke bāre meñ likhā hai,

Īsā ne roṭī lekar [...] kahā, “Yih lo aur khāo. Yih merā badan hai.” Phir us ne mai kā pyālā [...] unheñ dekar kahā, “Tum sab is meñ se piyo. Yih merā ḵhūn hai, nae ahd kā wuh ḵhūn jo bahutoñ ke lie bahāyā jātā hai tāki un ke gunāhoñ ko māf kar diyā jāe.”

(Mattī 26:26-29)

Āj tak us ke huzūr milkar khānā khāne se ham jo shāgird haiñ is khāne kī yād karke wuh tāqat pāte haiñ jo is duniyā meñ qāym rahne ke lie darkār hai. Sāth sāth ham us din kī ḵhushī manāte haiñ jab ham us ke sāth milkar uske abadī ghar meñ ziyāfat karenge.

► *Kyā āp achchhe charwāhe kī yih taqwiyaṭ pāte rahte haiñ?*

Chauthā sabaq,

Achchhe Charwāhe kā Pyār Qabūl Karo

Khānā khāne ke bād Īsā Masīh Patras se muḵhātib huā, “Shamāūn, kyā tū in kī nisbat mujh se zyādā muhabbat kartā hai?”

► *Us ne yih kyon pūchhā?*

Salībī maut se pahle Īsā Masīh ne farmāyā thā ki āj rāt tum sab merī bābat bargashtā ho jāoge. Us waqt Patras ne etarāz kiyā thā ki dūsre be-shak sab bargashtā ho jāeñ, lekin main kabhī nahīñ hūngā. Matlab hai main dūsroñ se zyādā wafādār hūñ. Phir bhī us ne bād meñ tīn bār kahā thā ki main Īsā Masīh ko nahīñ jāntā. Yahī wajah hai ki Īsā Masīh ne pūchhā ki kyā tū mujh se zyādā muhabbat kartā hai?

Dekho hamāre āqā kī narmī. Us ne jhīrkī na dī. Is narm aur sādā sawāl se hī wuh Patras sahī paṭarī par lāyā.

► *Sahī paṭarī kyā thī?*

Yih ki apnī tāqat aur apnī hī wafādārī par faḵr mat kar balki us kām par jo mainne tujh se

muhabbat rakhne ke bāis kiyā hai. Pahle merā yih pyār qabūl kar. Tab hī tū sahī pyār kar sakegā—mujhe bhī aur dūsroñ ko bhī. Āindā mat lalkārnā ki tū hī sab kuchh ṭhīk karegā. Āindā yih mān le ki tū apnī tāqat se kuchh nahīn kar saktā. Āindā fariyād kar ki ai Ḳhudāwand, merī madad kar tāki main tujhe pyār kar sakūñ, tere pīchhe chal sakūñ.

Lekin Īsā Masīh ko yih sārī bāteñ kahne kī zarūrat nahīn hai. Wuh bas yih pūchhtā hai ki kyā tū mujhe pyār kartā hai.

► *Wuh kyon sirf yih pūchhtā hai ki kyā tū mujhe pyār kartā hai?*

Jo Masīh kā ghar wālā ban jātā hai us ke rishte kā bandhan muhabbat hai. Masīh kā pyār use mazbūt kar detā hai aur jawāb mein hī wuh use aur dūsroñ ko pyār kar saktā hai. Pāñchwāñ sabaq,

Achchhe Charwāhe kī Fitrat Apnāo

Patras ne jawāb diyā, “Jī K̄hudāwand, āp to jānte haiñ ki mainī āpko pyār kartā hūñ.”

Īsā Masīh bolā, “Phir mere leloñ ko charā.”

► *Yih lele kaun haiñ?*

Lele wuh sab haiñ jo achchhe charwāhe kī bheṛeñ haiñ.

► *Charāne kā kyā matlab hai?*

Jis tarah Īsā Masīh tamām bheṛoñ kā achchhā charwāhā hai usī tarah wuh chāhtā hai ki Patras chhoṭe paimāne par charwāhā ho. Wuh dūsroñ se achchhe charwāhe kā-sā sulūk kare. Har shāgird ko achchhe charwāhe kī fitrat apnāñ hai.

► *Achchhā charwāhā kyā kartā hai?*

Wuh apnī bheṛoñ kī dekh-bhāl kartā hai. Wuh har ek kī fikr kartā hai. Itnī fikr ki us ne apnī jāñ apnī bheṛoñ kī k̄hātir dī. Soch lo: Agar har shāgird chhoṭe paimāne par achchhe charwāhe kī fitrat apnāe to kitnā bhalā hogā. Misāl ke taur

par agar mān-bāp apne bachchoñ ke achchhe charwāhe hoñ to kyā ḳhūb. Lekin dhyān do: Jo bhī charwāhā ho wuh tab kāmyāb hogā jab wuh Īsā Masīh ko pyār karegā. Aur wuh tab Īsā Masīh ko ṭhīk tarah se pyār karegā jab us ne uskā pyār qabūl kiyā hogā.

Tab Īsā Masīh ne ek aur martabā pūchhā, “Shamāūn, kyā tū mujh se muhabbat kartā hai?”

Us ne jawāb diyā, “Jī Ḳhudāwand, āp to jānte haiñ ki main āpko pyār kartā hūñ.”

Īsā Masīh bolā, “Phir merī bheṛoñ kī gallābānī kar.” Tīsrī bār us ne us se pūchhā, “Shamāūn, kyā tū mujhe pyār kartā hai?”

Tīsrī bār yih sawāl sunane se Patras ko baṛā dukh huā. Us ne kahā, “Ḳhudāwand, āpko sab kuchh mālūm hai. Āp to jānte haiñ ki main āpko pyār kartā hūñ.”

Īsā Masīh ne us se kahā, “Merī bheṛoñ ko charā.”

► *Us ne yih sawāl tīn bār kyoñ pūchhā?*

Patras ne tīn bār kahā thā ki main̄ Īsā Masīh ko nahīn jāntā. Islie Īsā Masīh ne tīn bār yih sawāl pūchhā. Yih Īsā Masīh kā ham se sawāl bhī hai. Be-shak ham sab se bār bār ḡhalatiyān hotī rahtī haiñ. Be-shak ham apnī harkatoñ se kaī bār use dukh pahuñchāte haiñ. Lekin wuh hamen̄ jhiṛkī nahīn detā. Wuh bas yahī sawāl pūchhtā rahtā hai ki kyā tū mujhe pyār kartā hai? Us se muhabbat sab kuchh hai. Agar yih pyār na ho to sab kuchh bakwās hai, chāhe ham kitnā achchhā kām kyon̄ na karen̄. Islie lāzim hai ki ham apnī kamzorī ko mānkar uskā pyār qabūl karen̄ aur Patras ke sāth kaheñ ki ai Ḳhudāwand, tū to jāntā hai ki main̄ tujhe pyār kartā hūñ. Tab hī wuh hamen̄ achchhe charwāhe kī fitrat detā hai, wuh fitrat jo uskī madad ke baḡhair hamāre andar nahīn hotī. Tab hī wuh hamen̄ wuh barkat detā hai jo ham apne zor se pā nahīn sakte. Kaī bār uskī fitrat ko apnāne se bahut saḡht natīje nikal sakte haiñ.

Pyār Karne kā Ek Natijā

Īsā Masīh ne farmāyā, “Maiñ tujhe sach batātā hūñ ki jab tū jawān thā to tū ḵhud apnī kamr bāndhkar jahāñ jī chāhtā ghūmtā-phirtā thā. Lekin jab tū būṛhā hogā to tū apne hāthoñ ko āge baṛhāegā aur koī aur terī kamr bāndhkar tujhe le jāegā jahāñ terā dil nahīñ karegā.” (Yih bāt is taraf ishārā thī ki Patras kis qism kī maut se Allāh ko jalāl degā.) Phir us ne use batāyā, “Mere pīchhe chal.”

► *Īsā Masīh yih kahne se kis taraf ishārā kar rahā thā?*

Bād meñ Patras shahīd ho jāegā. Qadīm tāriḵhī gawāh likhte haiñ ki kuchh sāl ke bād use salīb par chaṛhāyā gayā. Achchhe charwāhe ke qadamoñ meñ chalne se yahī natijā niklā.

► *Āḵhir meñ Masīh ne kyā hidāyat dī?*

Mere pīchhe chal. Yih sahī pyār hai. Jo Īsā Masīh ko pyār kartā hai wuh us ke pīchhe chaltā hai. Bheṛ apne achchhe charwāhe kī āwāz sunkar us ke pīchhe chaltī hai. Use

pūrā bharosā hai ki jahān charwāhā chaltā hai wahān main mahfūz hūn, chāhe yih rāstā salīb kā rāstā kyon na ho. Chhaṭā sabaq,

Āpasī Jalan Chhoṛ Do

Patras ne muṛkar dekhā ki Yūhannā un ke pīchhe chal rahā hai. Us ne sawāl kiyā, “Ḳhudāwand, is ke sāth kyā hogā?”

► *Patras ne yih kyon pūchhā?*

Yūhannā, Patras kī tarah Īsā Masīh ke bahut qarīb thā. Patras chāhtā thā ki ab Īsā Masīh, Yūhannā ke mustaqbil ke bāre mein bhī kuchh batāe. Yānī kyā use bhī shahādat kā jalāl milegā?

Lekin Masīh ne aisā na kiyā. Us ne jawāb diyā, “Agar main chāhūn ki yih mere wāpas āne tak zindā rahe to tujhe kyā? Bas tū mere pīchhe chaltā rah.”

► *Kyā us ne Yūhannā ke bāre mein kuchh batāyā?*

Nahīn. Us ne kahā ki tujhe kyā? Matlab hai dūsroñ kī taraf mat dekhna ki un ke sāth kyā

hogā. Apne āp par dhyān de. Mere pīchhe chaltā rah. Kitnī achchhī hidāyat! Ham sab hameshā is ḵhatre meñ hote haiñ ki apne āpkā muqābalā apne sāthiyon se karen. Is se ham meñ ehsās-e-kamtari, hasad yā apne āp par faḵhr paidā hotā hai. Masīh bas ek hī chīz ham se chāhtā hai—yih ki ham use pyār karke us ke pīchhe chaleñ. Ki ham achchhe charwāhe kī āwāz sunkar pūre bharose ke sāth us ke qadamon meñ chaleñ.

Kuchh logon ne yih bāt sunkar ḡhalat natijā nikālā—yih ki Yūhannā nahīn maregā. Lekin Īsā Masīh ne yih bāt nahīn kī thī. Us ne sirf yih kahā thā, “Agar main chāhūn ki yih mere wāpas āne tak zindā rahe to tujhe kyā?”

Ab dekho ham insānon kī ḡhalat soch. Bād meñ log andāzā lagāne lage ki Yūhannā, Masīh ke wāpas āne tak zindā rahegā. Un ko is par dhyān denā chāhie thā ki ham ḵhud kis tarah use pyār karte haiñ, ham ḵhud kis tarah us ke pīchhe

chalte haiñ. Masīh to yih kahne se is par zor de rahā thā ki Yūhannā kī fikr mat karnā balki apnī hī fikr kar ki kyā main achchhe charwāhe ko pyār kartā hūñ, kyā main us ke pīchhe chal rahā hūñ? Phir bhī un meñ se kuchh is sāf bāt se fazūl natīje nikālne lage the. Āḡhirī sabaq,

Achchhe Charwāhe kī Sachchāi Apnāo

Phir Yūhannā likhtā hai,

Yih wuh shāgird hai jis ne in bātoñ kī gawāhī dekar inheñ qalamband kar diyā hai. Aur ham jānte haiñ ki uskī gawāhī sachchī hai. (Yūhannā 21:24)

► *Yūhannā kis bāt par zor detā hai?*

Ek bār phir Yūhannā is par zor detā hai ki jo kuchh mainne sunāyā hai wuh mainne apnī āñkhoñ se dekhā hai. Is par aur zor dene ke lie wuh farmātā hai ki ham jānte haiñ ki uskī gawāhī sachchī hai. Jab wuh ‘ham’ kahtā hai to matlab yih hai ki yih na sirf merī gawāhī hai. Bahut-sāre logoñ ne is kī tasdīq kī hai. Agar

main koī ḡhalat bāt qalamband kartā to wuh zarūr etarāz karte. Islie wuh is par zor detā hai ki **ham** jānte haiñ ki uskī gawāhī sachchī hai.

Yih bāt hameñ ākhir meñ yād dilātī hai ki jo achchhe charwāhe kā sachchā shāgird hai uskī zindagī kī buniyād aur markaz sachchāī hai. Uskī zindagī meñ jhūṭh ke lie koī jagah nahīñ hai.

► *Kyā āpkī zindagī is sachchāī par mabnī hai?*

Sachchāī hī hamāre kānoñ ko khol detī hai tāki ham achchhe charwāhe kī pukār sun sakeñ, uskī barkat aur taqwiyaṭ pā sakeñ, uskā pyār qabūl karke uskī fitrat apnā sakeñ aur āpasī jalan ke bāis dūb na jāeñ. Āmīn.

Injīl, Yūhannā 21

Jhīl Par

Is ke bād Īsā ek bār phir apne shāgirdoñ par zāhir huā jab wuh Tibariyās yānī Galīl kī jhīl par the. Yih yoñ huā. Kuchh shāgird

Shamāūn Patras ke sāth jamā the, Tomā jo Jurwān kahlātā thā, Natanel jo Galīl ke Qānā se thā, Zabdī ke do beṭe aur mazīd do shāgird. Shamāūn Patras ne kahā, “Maiñ machhlī pakarṇe jā rahā hūñ.”

Dūsroñ ne kahā, “Ham bhī sāth jāenge.” Chunāñche wuh nikalkar kashtī par sawār hue. Lekin us pūrī rāt ek bhī machhlī hāth na āī. Subh-sawere Īsā jhīl ke kināre par ā kharā huā. Lekin shāgirdoñ ko mālūm nahīn thā ki wuh Īsā hī hai. Us ne un se pūchhā, “Bachcho, kyā tumheñ khāne ke lie kuchh mil gayā?”

Unhoñ ne jawāb diyā, “Nahīn.” Us ne kahā, “Apnā jāl kashtī ke dāeñ hāth ḍālo, phir tum ko kuchh milegā.” Unhoñ ne aisā kiyā to machhliyoñ kī itnī baṛī tādād thī ki wuh jāl kashtī tak na lā sake.

Is par Ḳhudāwand ke pyāre shāgird ne Patras se kahā, “Yih to Ḳhudāwand hai.” Yih sunte hī ki Ḳhudāwand hai Shamāūn Patras apnī

chādar oṛhkar pānī meñ kūd paṛā (Us ne chādar ko kām karne ke lie utār liyā thā.) Dūsre shāgird kashtī par sawār us ke pīchhe āe. Wuh kināre se zyādā dūr nahīn the, taqrīban sau meter ke fāsle par the. Islie wuh machhliyon se bhare jāl ko pānī meñ khīnch khīnchkar ḡhushkī tak lāe. Jab wuh kashtī se utre to dekhā ki lakaṛī ke koyloñ kī āg par machhliyāñ bhunī jā rahī haiñ aur sāth roṭī bhī hai. Īsā ne un se kahā, “Un machhliyon meñ se kuchh le āo jo tum ne abhī pakṛī haiñ.” Shamāun Patras kashtī par gayā aur jāl ko ḡhushkī par ghasiṭ lāyā. Yih jāl 153 baṛī machhliyon se bharā huā thā, to bhī wuh na phaṭā. Īsā ne un se kahā, “Āo, nāshtā kar lo.” Kisi bhī shāgird ne sawāl karne kī jurrat na kī ki “Āp kaun haiñ?” Kyonki wuh to jānte the ki yih Ḳhudāwand hī hai. Phir Īsā āyā aur roṭī lekar unheñ dī aur isī tarah machhlī bhī unheñ khilāi.

Īsā ke jī uṭhne ke bād yih tīsri bār thī ki wuh apne shāgirdoñ par zāhir huā.

Patras se Sawāl

Nāshte ke bād Īsā Shamāūn Patras se muḵhātib huā, “Yūhannā ke beṭe Shamāūn, kyā tū in kī nisbat mujh se zyādā muhabbat kartā hai?”

Us ne jawāb diyā, “Jī Ḳhudāwand, āp to jānte haiñ ki maiñ āpko pyār kartā hūñ.”

Īsā bolā, “Phir mere leloñ ko charā.” Tab Īsā ne ek aur martabā pūchhā, “Shamāūn Yūhannā ke beṭe, kyā tū mujh se muhabbat kartā hai?”

Us ne jawāb diyā, “Jī Ḳhudāwand, āp to jānte haiñ ki maiñ āpko pyār kartā hūñ.”

Īsā bolā, “Phir merī bheṛoñ kī gallābānī kar.” Tīsri bār Īsā ne us se pūchhā, “Shamāūn Yūhannā ke beṭe, kyā tū mujhe pyār kartā hai?”

Tīsri dafā yih sawāl sunane se Patras ko barā dukh huā. Us ne kahā, “Ḳhudāwand, āpko sab kuchh mālūm hai. Āp to jānte haiñ ki maiñ āpko pyār kartā hūñ.”

Īsā ne us se kahā, “Merī bheṛoñ ko charā. Maiñ tujhe sach batātā hūñ ki jab tū jawān thā to tū Ḳhud apnī kamr bāndhkar jahāñ jī chāhtā ghūmtā-phirtā thā. Lekin jab tū būṛhā hogā to tū apne hāthoñ ko āge barhāegā aur koī aur terī kamr bāndhkar tujhe le jāegā jahāñ terā dil nahīñ karegā.” (Īsā kī yih bāt is taraf ishārā thī ki Patras kis qism kī maut se Allāh ko jalāl degā.) Phir us ne use batāyā, “Mere pīchhe chal.”

Dūsrā Shāgird

Patras ne muṛkar dekhā ki jo shāgird Īsā ko pyārā thā wuh un ke pīchhe chal rahā hai. Yih wuhī shāgird thā jis ne shām ke khāne ke daurān Īsā kī taraf sar jhukākar pūchhā thā,

“Ḳhudāwand, kaun āpko dushman ke hawāle karegā?” Ab use dekhkar Patras ne sawāl kiyā, “Ḳhudāwand, is ke sāth kyā hogā?”

Īsā ne jawāb diyā, “Agar main chāhūn ki yih mere wāpas āne tak zindā rahe to tujhe kyā? Bas tū mere pīchhe chaltā rah.”

Natīje meñ bhāiyon meñ yih ḳhyāl phail gayā ki yih shāgird nahīn maregā. Lekin Īsā ne yih bāt nahīn kī thī. Us ne sirf yih kahā thā, “Agar main chāhūn ki yih mere wāpas āne tak zindā rahe to tujhe kyā?”

Yih wuh shāgird hai jis ne in bāton kī gawāhī dekar inheñ qalamband kar diyā hai. Aur ham jānte haiñ ki uskī gawāhī sachchī hai.

Ḳhulāsā

Īsā ne is ke alāwā bhī bahut kuchh kiyā. Agar uskā har kām qalamband kiyā jātā to mere ḳhyāl meñ pūrī duniyā meñ yih kitāben rakhne kī gunjāish na hotī.